

Regional News Unit AIR Aizawl  
Thursday, April 04, 2024

Time - 7:30 -7:40Hrs

## REGIONAL NEWS BULLETIN

### HEADLINES (MORNING)

- Pathianni zing atanga Thawhlejni tlai thlenga thlipui, ruah leh rial tla-in Mizorama in a tichhiat report dawn khawm mek a ni a, hriat theih chinah in chhia hi 1,600 chuang a tling tawh.
- Lok Sabha inthlana tlin ngei tumin political party hrang hrangin campaign beihpui an thlak chho mek zel.
- MZP chuan MPSC Civil Service Combined Examination hna lak hnuhnung berah thil fel lo tam tak a awm ngei nia an hriat avangin MPSC Chairman chu bang turin an ngen.



### DISASTER

Pathianni zing atanga Thawhlejni tlai thlenga thlipui, ruah leh rial tla-in Mizorama in a tichhiat chu 1,600 chuang a tling tawh.

Thawhlejni tlai dar 3 vel khan Lawngtlai district-a Sangau khua-ah rial tam tham tak a tla a. In 542 a tichhia a. He'ng zinga in paruk chu luah tlak lohin a chhia a ni. Thawhlejni tlaia rial tla hi a tam thamin, artui tiat dawn te a ni a, rial tla hian kawngpui hnawh pingin khawl hmanga thenfai a ni. Hriat theih chinah rial hian Ramhlun Sangau-ah In 39 a tichhia a, Sangau-I ah In 48, Sangau-II ah In 127, Sangau-III-ah In 50 leh Sangau IV-ah In 109 a deng chhia a. Sangau khua bikah hian In 373 a dengchhia a, thawmthat deuh a luahzui leh mai theih te niin, luahzui tlak loha chhia a awm hriat a ni lo. Rial tla hian Pang khuaah In 15 deng chhiain, luahzui tlak loh In 2 a awm a, Thaltlangah In 57 chhiain, In pali chu luah zui tlak a ni lo a. Cheural-ah In chhia 48 a awm bawk a ni. Heng bakah hian Rawlbukah In pakhat rial hian a dengchhia a, Sentetfiangah In chhia 48 a awm bawk a ni. Lawngtlai East bialtu MLA Dr. Lorrain Lalpekliana Chinzah chuan tanpuina hmasa atan Thawhtanni tlai khan Silpaulin engemawzat a pe nghal a. Nimin khan bialtu MLA hi a dam that loh vangin aiawh tirin LADC-a ZPM MDC Pu K. Hre Kung hovin ZPM Lai District hruaituten chhawmdawlina an sem chhunzawm a, an mamawh dan azirin silpaulin leh pawisafai ten tanpui an ni.

Puan tawh angin Thawhtanni tuka rial tla khan Kolasib District-a khua leh veng 9-ah mihring chenna In leh mihring chenna ni lo, sorkar building leh Biak In 744 a tichhia a. In chhiate hi a tam zawk chu rial-in a chung chauh a tichhiat te niin, thli a tel avangin Lungdai-ah chenna in pakhat chu a vaiin a chhe vek a ni. Kolasib district bawrh sap pisa-a District Disaster Management & Rehabilitation, Kolasib-in an chhinchhiah dan chuan thli leh rial thawk avanga harsatna tawk khua te hi hriat theih chinah Lungdai, Serkhan, Buhchangphai, Bilkhawthlir North leh South, N Chawnpui, N. Chhimluang, Saiphai leh Saipum te an ni.

Champhai district-ah pawh thlipui thawkin in 134 a tichhia a. In 5 luah tlak lohvin a chhia a, In 129 chu a then azar a chhia a, chung zingah chuan Middle sikul 1, High School 1, Higher Secondary School 1, PES 1, Supply Kudam 1, Myanmar ralhlante dahna buk 7 leh District Jail 1 te an tel. Tun thlenga hriat theih chinah Champhai District-a khua leh veng 23 a mihring 690 ten an tuar a ni. Report hi a la lut reng a ni. Mamit district-ah chuan Thawhtanni tuka rial tla khan in 55 a tichhia a. A hma ni-a thlipui tleh khan in 52 a ti chhe bawk. Khawzawl district-ah chuan Pathianni a thli tleh leh rial tla avangin in 77 a chhia tih report dawn a ni tawh.

Serlui bialtu MLA Pu Lalrinsanga Ralte chuan Pathianni kalta zana rial nasa tak tlain Serlui bial chhung khaw hrang hrang - Bilkhawthlir, Saipum, Saiphai, N. Chhimluang leh N. Chawnpui khuaa chenna In, Biak In, Vantlang building leh sorkar building 580 a tihchhiat chu Thawhlethni leh nimin khan a tlawh. Hriat theih chinah Serlui bial chhungah hian rial tla-in chenna In, Biak In, Vantlang hmun leh sorkar building a tihchhiat zat chu Bilkhawthlir-ah 414; Saipum-ah 67; Saiphai-ah 7; N.Chhimluang-ah 76 leh N.Chawnpui-ah 16 a ni a, a vaiin 580 a ni.

Tunhnaia Mizorama ruah,thlipui leh rial thawk avang khan hriat theih chinah Saitual District huam chhung khaw 6, heng Keifang, Saichal, Tawizo, Buhban leh Lailak atangin chhungkaw 43 leh Tualbung khuaah chenna in chung rial den chhiat 74 nen In chhia report hi a vaiin 117 a a awm a. Thli leh rialin Pathianni leh Thawhtanni a a tihchhiat tanpuina hi State Disaster Respond Fund (SDRF) hnuai atangin nimin khan chhiat tawh chhungkuate Bank Account-ah Saitual Bawrsap Dr. Lalgura Tlau hmalakna-in thun a ni.



#### POLL-EXHIBITION

Lok Sabha Inthlanpui 2024 lo awm tur atana SVEEP Aizawl District-in inthlan chungchang inhrilhriatna leh zirtirna kawnga hma a lakna peng pakhat atan Millennium Centre chhuat zawlah Art Workshop & Exhibition a buatsaih.

Nimin khan Aizawl District Election Officer, Pi Nazuk Kumar-i chuan lemziak pholanna hun hi a hawng a. He Art workshop & exhibition hi ni thum chhung aw h tur niin April ni 5 thleng a aw h dawn a, Aizawl Art Gallery & School of Fine Arts nen thawk hova buatsaih a ni.

Pi Nazuk Kumar-i chuan MLA inthlanah Mizoramah vote a tlak that viau thin thu leh a dawt chiah MP inthlanah vote tla a kiam tak thin thu a sawi a. A inkar a hlat loh avangin MP inthlan chu ngaih pawimawh thar a tul tih sawiin DEO chuan, seat pakhat chauh nei mah se seat pakhat luahtu chuan state tan hmasawna tur tam tak a thlen thei, a ti a. Lemziak thiamte nen thawkhova vote pawimawhna an puang chhuakho thei tur chu lawmawm a tih thu sawiin vote nei tawh phawt chu vote thlak ngei turin a chah a ni.

He hunah hian Aizawl Art Gallery & School of Fine Arts Pu Laltanpuia chuan Art chu thu pawimawh inhrilhriatna hmanraw tangkai tak a nih thu sawiin, inthlanpui pawimawh tak ramin a hmachhawn tur inpuahchahnaah DEO Aizawl leh a thawhpuite'n lemziak thiamte an thawhpui chu a lawmthu a sawi a ni.



AAP SUPPORT

Aam Aadmi Party (AAP) Mizoram chuan kumin Lok Sabha inthlan lo awm turah candidate hranpa nei lovin Congress Candidate Pu Lalbiakzama an thlawp tur thu an puang.

AAP Mizoram President Andrew Lalremkima chuan nimina Aizawl Press Club-a chanchinbumite a kawmnaah central-a INDIA Alliance hnuaiiah Congress-te nen an thawhho mek avang leh, Delhi lama an hruaituten BJP paihthlaa democracy an tun din a beiseiin Pu Lalbiakzama, INC candidate chu an thlawp dawn a ni, a ti.

AAP Mizoram President chuan BJP sawrkarna hnuaiiah Eptu Party-te rahbehin an awm nasa hle a, dan hrang hrang siam tharin an pu ber Arvind Kejriwal-a chu Prevention of Money Laundering Act flawhchhanin jail-ah an khung mek a ni, a ti a. Ani bakah minister pahnih jail-ah an khung mek a, BJP chuan AAP chu an hlau hle a ni tih an chet dan hian a entir, a ti bawk.

Pu Andrew Lalremkima chuan BJP-in Mizorama MLA an neihna hmun chu uluk taka mipuiten ngaihven a tul hle, a ti a. Mizoram hmasawna ai chuan hnam hrang hrang awmte thendarh leh inhuattir an duh ber tih a sawi bawk a ni.

<><><>

MNF PRESS CONF.

MNF Adviser Pu K. Lalsawmvela'n Chief Minister kal chhuak MNF President Pu Zoramthanga hmalakna zarah Mizoramin inkalpawhna kawngpui tha tak a nei, a ti.

Pu K. Lalsawmvela chuan Chief Minister kalchhuak ta Pu Zoramthanga'n PMDevine hnuaiiah a hranpa ngatin Union Budget hnuaiiah Cheng vbch 500 a sawi chhuak, a ti a; Aizawl bypass road chu hmasawna lian tak tur a ni tih sawiin MNF sawrkar hmalakna chu sawrkar tharin tha taka a tih hlawhtlin ngei a beisei tih a sawi.

MNF Adviser chuan Chief Minister Pu Lalduhoma'n kum tir lama Delhi a zin report a pekin leiverh bikah harsatna a awm a, cancel hial an tum a tih leh Union Minister for Road Transport and Highway Nitin Gadkari-a a sawipui hnua pawm leh ni ta anga a sawi chu thangthat a lak duh vang leh mipui rilru dik lova hruai kawi tumna leh a hriat chian loh vang a ni, a ti a. Aizawl bypass tunnel chu cancel leh enthat turin rawtna a awm ngai lo tih sawiin nikum October-ah tender pawh chhuah vek tawh a ni, a ti.

Pu K. Lalsawmvela chuan ZPM Leader, CM Pu Lalduhoma'n ZPM Sawrkarin EPC Mode contract kalpui hmasa ber nia a insawi chu thu dik tawk lo a ni, a ti a. EPC Mode contract chu kum 2018 atangin state PWD-in a hmang tan daih tawh tih sawiin Bamboo Link Road pahnih EPC Mode-a tender chhuah a ni, a ti bawk.

MNF Adviser chuan MNF sawrkar chhungin Pu Zoramthanga'n Mizoram kawngpui hmasawna tur tam tak a sawichhuak, a ti a. Lunglei Bypass road chu MNF hmalaknain a puitling chho mek tih sawiin National Highway-6 (Seling leh Champhai inkar kawngpui) leh Myanmar ramri hrula kawngpui sial turah te nasa takin Ministry hmasa ah hmalak a ni, a ti a. Aizawl Sustainable Urban Transport Project te leh Silchar atanga Sairang inkar kawngpui chu an sawrkar lain nasa takin hma an la, a ti a, a hlawhtlinna hmuh chhoh mek a ni a ti bawk.

<><><>

MZP

MZP chuan MPSC Civil Service Combined Examination hna lak hnuhnung berah thil fel lo tam tak a awm ngei niin an hria tih sawiin thalai hna zawng mek ten MPSC-ah rinna an nghah zel theih na'n MPSC Chairman bang turin an ngen.

MZP Executive Committee thuchhuah tarlan danin MPSC Civil Service combined exam paper thenkhatah correcting fluid-te hman niin, mark pek tawhsa thaichhiatna leh mark tihdanglamna hnuhma thahnem tak a awmin an hria a; MPSC hnuaiyah hetiang sulhnu mak tak tak a awm chu pawl an ti takzet a. Thil dik lo tak thleng chu MPSC Chairman thiam loh a nih avangin MPSC zahawmna humhim a nih zel theih na'n leh thalai hna zawng mekte'n MPSC-ah rinna an nghah zel theih nan, MPSC Chairman chu bang turin an ngen a ni.

<><><>

HEROIN HAUL

Excise and Narcotics department hnathawkte chuan nimin khan Falkland vengah Aizawl View hmunah Heroin kg 5 leh gram 427 a rit an man.

Nimina heroin man hi Mizorama tum khata heroin man hnem ber pawl nia hriat a ni a. Department thupuangtu Pu Peter Zohmingthanga sawi danin nimin chawhma dar 10:30 khan Aizawl View, Falkland Veng-ah Heroin Kg 5 leh Gram 427 (Hawng 440) leh a neitu nia puh mi pahnih – Lalnunmawia, Puia ti a koh, kum 38 , Teidu, Tripura (tuna Edenthar Venga khawsa mek) leh Lalchawiliana kum 34, Khampat Kanaan, Myanmar (tuna Vairengte Kawngthar vengah khawsa mek) ni a inchhalte chu an man. Heng Heroin te hi Myanmar atanga rawn lak, Second Hand Bale kara thuhruk an ni. Heroin phurh kualna atana hman TATA YODHA truck (MZ01 V-2018) pawh hrensak nghal an ni. Heroin vengah mante hi The Narcotic Drugs & Psychotropic Substances Act, 1985 tlawhchhanin thubuai siamsak an ni.

<><><>

ARECA NUT

Nimin khan Mamit District Thalai Pawl hruaitute te leh Hachhek Bial Kuhva Chingtu Pawl hruaitute chuan Mizoram sorkarin Foreign Kuhva dan lova Mizoram chhunga lak luhte dona atan Mamit District chhungah sawrkar hmalakna hmun Dapchhuah leh Zamuang Check post te rintlak leh changlung zawka thum tha turin Mizoram sawrkar an ngen.

Mizoram chhunga Kuhva tharchhuahte hralh kawngah Mizoram sawrkarin kuthnathawktute kuta dah mai lovin an mamawh ang hralhna tha zawk an nei theih na'na hma laksaka Minimum Support Price pawh siamsak tur leh Mizoram kuhva tharchhuah te State danga a hnawn mai loh na'na hma laksak turin an ngen a ni.

<><><>